

石  
柏  
山  
房  
詩  
存

石柏山房詩存卷之四

太湖趙文楷著

遄征集

余以嘉慶四年九月蒙 恩給暫假省親出都卽病  
困臥車中未嘗爲一詩也抵家匝月又以假滿匆遽  
入都北風吹面雨雪載途所攜僮僕隸數輩旅舍無

可與語者非寄情吟咏何以遣懷計得詩六十餘首  
聊以息勞筋消旅思工拙蓋不計云

途中遣懷

歲暮 王程迫匆匆來復還澗邊枯樹雪雲外夕陽山舊  
轍今猶在勞薪苦未閒榻前孤燭影尊酒破愁顏

過投子寺

昔聞投子寺，鹿苑舊知名。  
咫尺不能見，塵勞愧此生。  
夕陽千樹冷，殘雪四山明。  
漠漠桐溪過，從茲事遠征。

過舒城

漢史傳循吏，文翁治最良。  
近憐朱邑墓，遺愛在桐鄉。  
欲訪梅仙洞，藤蘿日已曛。  
仙人不可見，青山空白雲。

文翁莊

北風起大澤哀鴻求其曹我行未云已霜露濕征袍亭午  
過舒城懷古心忉忉漢廷吏治重要惟撫字勞民生本自  
遂爲政幸無撓功績豈在異名譽徒爲高畧者不入池靜  
鱗寂無囂獵師不在山恬翼紛翔翺西蜀方用師亭障羅  
弓刀芸芸亦我類豈樂爭逋逃 聖澤積云厚誰爲屯其  
膏得非符竹吏誅求析秋毫我過文翁莊尊酒陳溪毛安

能令公起坐使回滔滔

大霧

嚴冬陽氣盛夜卧坦不冷蚤蚤攪清夢更漏何耿耿晨起  
登前途遙望時引領初日出如盤蒼翠四山靜須臾天地  
易冥冥失前境鳴雞罷不聞老樹欹無影金斗迷高墉浮  
槎

山名

暗孤嶺坡陀遞高下有如波萬頃我心恠且悻欲

去不能騁冬霧占欲雪愁絕寒風猛戀  
闕日維勞貪程  
夜自警且盡手中觴無爲憂恹恹

宿張橋喜晴

昨夜漫漫畏北風濕雲濃霧幕遙空正愁朔雪連郊暗却  
報新晴入檻紅行脚免教泥滑滑舉頭惟愛日瞳瞳天公  
作意真難測課雨占晴總未工

虞姬墓

在定遠縣

中分伯業已成塵一劍寧堪惜此身莫笑黃壚分塋玉厠

中瘡痍更何人

相傳靈璧塋其身定遠塋其首戚姬不從漢高死是不如虞姬處也

過定遠

舊日王侯氣似雲祇今荒草墓門扃憑誰閱盡興亡事惟有淮山數點青



過大洪山山盡黑石因取閒道至總鋪故過此山  
寒色澹空翠落日四山紫山徑曲如盤黝然石齒齒人行  
石勢動有如涉黑水參差高下異宛轉波濤起又如公孫  
宏東海牧羣豕長竿一揮斥奔突未能已僕夫貪捷徑間  
道尋前軌車行格磔間推挽羣如蟻力盡不得上艱難誰  
爾使逡巡覓村店疾驅不十里暝色已蒼然墟烟靜瀰瀰

舉杯息勞筋濁醪有至理

清淮樓

在臨淮

清淮樓下清淮水千古東南日夜流  
極目關河爭阨塞異時豪傑閔山邱  
蕭蕭殘葉冬仍在耿耿疎星曉未收  
便著征裘騎馬去五雲遙指是神州

過臨淮至卅里鋪宿

寒雲烟樹莽無涯  
雲際青山面面排  
天與夕陽留古寺  
人隨落葉渡清淮  
舊詩題壁尋猶在  
濁酒澆愁醉亦佳  
北闕尚遙家漸遠  
今宵何以慰情懷

村居

門臨溪水碧粼粼  
淡月寒煙一色勻  
犬吠竹籬燈火出  
夜歸知是趁墟人

渡固鎮河

烏鵲羣飛天欲霜  
晚風獵獵集帆樯  
寒流倒影涵空碧  
缺月和烟印淡黃  
近市魚蝦容果腹  
隔溪鳬雁自成行  
匆匆閱盡江南景  
明日黃塵污短裳

邨店遣懷

蒼然暝色暗遙山  
茅店猶堪息病孱  
莫笑打頭嫵小屋  
且

貪容膝破愁顏玉堂瑣闥疑真幻土銍泥尊若等閒不是  
春官名偶望此身原祇任田間

贈陳錦堂刺史

名洪緒

衝泥路滑雨冥冥傾蓋如君得暫停詩句自應塵外賞頌  
聲已在洛中聽人來麥秀驅車隴風靜棠陰過客亭別後  
相思定回首白雲深處曉山青

陽城

宿州城南卽所謂惑陽城迷下蔡者也

一笑何須巧傾城  
不自知深宮多嫉妬  
應悔畫蛾眉

雨後過苻離關

小雨初晴送曉寒  
衝泥未敢息征鞍  
淮山一帶青如洗  
暫與勞人倦眼看

拜閔子祠

石柏山房詩存

卷四

七

當世聞純孝皇然冀見之斯人稱至德千載起遐思汶上  
傳遺迹彭城拜古祠蘆花池水畔淅瀝晚風吹

觀魚

黃河漫流退復急隄邊日暮漁師集密罾細網不肯遺小  
魚鱗鱗大魚立就中有物一丈長欲走不脫鱗甲張口吐  
餘沫氣垂盡雙眸漠漠昏無光人言蛟龍之種不可傷我

謂介類殊章常不然胡爲困且僵爾胡不爲河伯訴安流  
慎勿墮隄防我民幸得保廬舍爾亦窟宅深潛藏魚乎魚  
乎勿自苦困辱泥塗皆爾取爾如神物自有神夜半飛空  
致雷雨

宿州渡河決處

聞說黃河天上來天公不爲下民哀高原夜半移蛟窟平



陸春深失雉媒人嘆爲魚經久困我猶騎馬更重回烟波  
兩岸蒼蒼樹不忍臨流重溯洄

燕子樓

在徐州

紅粉成灰春復秋尙書功業亦山邱不因白傳留題在寂  
寞當年燕子樓

重過徐州

城南爲汴  
泗交流處

十月曾經戲馬臺  
館人驚見客重回  
夜烏繞樹爭南去  
候鴈隨人嚮北來  
恨別夢殘關月冷  
過河風急暮雲開  
欲尋汴泗交流處  
暝色蒼蒼下古苔

徐州懷古

驅車重過古徐州  
百感情深不自由  
兩界山河餘戰壘  
千年城郭枕寒流  
歌風亭圯斜陽冷  
戲馬臺空暮靄稠  
楚漢

爭雄竟何往滄波無際使人愁

渡徐州黃河

河決上流此間竟無水矣

昔年此地招舟處夾岸波濤氣勢雄  
豈料褰裳真可涉爭教集葦竟無功  
河流已自平城郭天意應將困沛豐  
萬頃污泥無洩處金隄十仞枉穹窿

雪

暝色烟光兩不分  
雪花撲面酒餘醺  
昏鴉覓樹寂無影  
冷

雁穿雲時一聞  
石壁斷文多燦燦  
葦牕清響忽紛紛

柳泉人

俱砌石壁

關山歲暮艱辛徧  
欲寫離愁寄卯君

### 宿沙溝雪夜

風撼茅簷夢欲殘  
一痕燈影夜漫漫  
天涯雨雪懷人切  
歲晚關山行路難  
秦蜀師興還裹甲  
東南河決尙狂瀾  
瑤

樓玉宇高寒處只恐憂民卧未安

入山東界

落日墟烟直寒風雁影偏  
馬驚深澗雪人上古原田  
除夕無多日明朝是小年  
江南重回首山翠入遙天

旅舍見蠟梅

淡烟疎雪見風姿殘臘園林此最宜  
一種芳魂消不得枉

教名號附南枝

蠟蕊檀心鬪媚妍旅人見此劇堪憐憑誰說與林和靖獨  
愛梅花恐未然

滕文公祠

古樹參差鳥雀馴荒祠雖在日荆榛天心未肯容戡亂王  
道何嘗不近人微弱依賢猶眷眷井田遺跡尙畇畇莫將

成敗論前事我欲從公拜下塵

兩界驛阻雪

北風吹車掀且簸堅冰疑髭不可唾雲陰雪色兩不分時  
見飛鴻來一箇朱門此夕芳筵開急管清歌喧四座獸炭  
炙地紅簾垂不怕雪花如掌大豈知老屋茅簷底有人垂  
頭凍且餓我今行役畏寒逼衣裳苦被青泥漉夜深不惜

濁醪傾骨冷且貪重褥坐遙憶南陽老安仁新詩堆几無

與和

謂表兄  
潘築巖

溪南梅花白於雪嫩蕊已向春前破回首關

山一千里撩人鄉思愁無那明朝天氣定開霽獨對寒燈  
且高卧

拜孟子廟

戰國無夫子斯文久絕源功宜神禹並氣比泰山尊洙泗



傳遺緒齊梁息過軒  
滛辭闢楊墨高論叱  
驩髡好辯誠難已登  
車豈憚煩羣言息簧  
鼓吾道得離藩廟祀  
春秋重祠官俎豆存  
豐碑欽列聖榮爵及  
仍孫柏幹依簷角雲  
陰護墓門震泉通道  
脉枯樹識靈根雷震泉及鉄樹皆在廟中  
再拜瞻遺像興懷立  
古原斜陽渡高閣殘  
雪掛崇垣仁義昭今  
昔羲娥歷曉昏七篇  
高且美衆喙莫輕論

過兗州

城樓曰南樓又名岳雲杜工部詩所云南樓縱目初者也

曉色明林表  
驅車過兗州  
殘烟泗水樹  
晴雪嶽雲樓  
故殿基仍在  
高臺跡尙留  
長城荒草徑  
懷古興悠悠

渡汶水

泰岱落我後  
徂徠橫我前  
汶水清淺流  
白沙明且鮮  
遙看遠林底  
素練鋪平川  
歷盡原上邨  
始識天邊煙  
迢然風景

佳況資梨棗便何時結茅屋躬耕汶陽田

無鹽城

在東平州

汶上縣有文姜臺

汶水上文姜臺汶水下無鹽城湯湯東流日夜傾貞淫各有千載名野烟漠漠生荒草行人老盡東平道如今憎愛百不同亂頭粗服爭言好豈知無鹽傳在德妍媸自有真顏色賢姜亦賦碩人詩豈必娥眉盡傾國君不見宮中短

黑賈南風能使銅駝卧荆棘

梁灝里

大書碑石照千春偶提名塲那足珍博得齊稱佳父子可  
憐科目亦傳人

八十衰翁作狀頭梨園妝出儘風流渠儂遇合原非晚爭  
與今人說不休

數日冒雪而行兩人舁輿不能前進栖遲茅店感

歎而作

懷却牙牌走路塵茅簷高卧雪盈身千求不與吾儕事况  
復袁安是散人

穀城山詠留侯

史所云黃石公處在東阿縣

載筆多言怪吾尤太史公素書原未有黃石竟何功佐漢

名臣業仇秦國士風穀城山下路日暮碧雲空

旅舍除夕

關河滿地多離恨風雪漫天阻客程祇有夢魂留不住江  
南未了又春明

除夕感懷以四十明朝過爲韻得詩五首

時在東阿縣

伊昔未弱冠我父已我棄嗟哉陟岵人寒餓窮途淚閉門

閱世態十頗得三四彈琴碧天高此志期勿墜

男兒未成名忽忽幾三十偶然捷秋賦驚雷啟冬蟄從此  
志四方幕府容翔集鶴立傲王侯相見惟拱揖

家貧乞微祿四次來春明鍛翮豈無痛揣摩恨未成李蔡  
本下中胡爲冠羣英再拜赴聞喜 恩重身亦輕

王事念將母 恩命孝治昭趨 朝不敢緩逼此風雪朝

含淚別慈親出門魂自銷思之不可見長夜何迢迢

人生強仕年如日亭午過恒恐白髮逼長此容高卧歲月  
已云除寒燈對我坐起視天欲明一星如椀大

庚申元旦

憶昔趨朝聽五更雞鳴騎馬入承明千官珮響天風下三  
殿雲開海日生此日那無羈客感相思應有故人情

謂都中諸



友  
雪消河上峯青處遙指蒼蒼是玉京

宿在平縣二十里舖

店甚偏仄  
幾不容身

葦窻疎罅不禁風霜氣侵人卧似弓夜久忽聞冰柱折茅  
簷西畔響丁東

宿高唐州

東北有鳴石山拊之聲甚清越晉田  
宣隱此遇王中倫蓋周宣王時人也

霜氣罨空碧渺然新月高漠漠高唐城城下生蓬蒿昔者

綿駒氏善歌教其曹一唱百爭和意氣頗足豪奈何音響  
寂絕調如風騷豈無邨伎謳聒耳何嘈嘈東北有高山其  
石如琅璈拊之戛然鳴天風吹海濤中多仙隱人愛此常  
遊翺欲往從之遊矯首空寒臯天寒迫行役有如鷹在條  
倉皇覓村店熱火斟濁醪入口薄且劣聊以慰吾勞凍卧  
不成寐荒雞向我號驅車涉寒氷流水聲滔滔長生不可

學歲月如消膏仰天忽大笑世事輕鴻毛

過恩縣

戰國時爲平原君封邑西山在縣西

荒城寂寞空斜曛城邊松柏多古墳古人千載不可見至  
今猶憶平原君驅車直向安陵路烏啄層冰鳥爭樹浮雲  
盡處是西山漠漠寒烟起孤戍

恩縣苦水鋪飲苦水

味鹹且苦不可入口作此謔之

碧甌擎出味難堪地有佳名信不慙日飲清泉誰領畧只  
今方識是和甘

滄海熬波苦且嚴由來不與蜜爭甜此中亦有和羹用可  
惜無人解作鹽

過德州

江南過了又青齊明日燕南路向西誰信春光隨客到衛

河烟柳已萋萋

過景州

東風吹面作嚴寒地入幽燕客思殫  
一塔高擎天半壁孤城遠控路千盤  
廣川臺上黃雲覆細柳營邊白日殘  
騎馬幾經新歲月紅塵衣袂不勝彈

初六夜對月有感

前月以初七  
起程入都

往時見月思依依此際相看意緒非却憶臘前今夜裏猶  
煩慈母密縫衣

宿商家林宿店卽前卧病之所感歎作此

憶昨經過日愁繁病亦繁秋風孤榻冷涼雨一燈昏藥物  
從醫悞扶持賴僕存微軀今幸在尊酒爲招魂

余前病此  
爲庸醫投

攻伐之劑  
幾至不起

僕僕何曾慣勞生不自由風霜偕我老離別使人愁歸信  
先梁燕行踪愧磨牛莫興金盡歎猶有黑貂裘

過河間府

蔓草斜陽路蕭蕭正朔風行人回首望愁絕日華宮

官在府城

獻王所築

僚從皆文學遺經細討論何如梁苑客只慣賦長門

委鬼何爲者山靈亦垢哉當年西市血流不到瀛臺

白溝河行寓題壁

白溝河上草蕭蕭野曠天低四望遙關隘從來爭上谷風  
雲猶自憶前朝百年戰鬥分燕趙兩界山河判宋遼薄海  
車書今一統戎樓春靜暮烟消

五代兵殘亦可吁戢戈未暇計偏隅邊關久失漁陽郡天



府忘收督亢圖

白溝河卽督亢水下流

宿將猶存兵力威江南已了

蜀都無如何祇禁人鼾睡一任跳梁在要途

將至都先呈都中諸友

鳳城翹首路逶迤猶幸無違赴 闕期九十日中疑醉夢

三千里外寄懷思梅花著意開偏早春色隨人到亦遲持

贈一無君莫笑探囊猶有紀程詩

十一日立春余亦以是日到京

十一日入都

去時秋盡又初春  
鴻爪泥中跡又新  
若見梅花應一笑  
相逢已是隔年人

彈指年光冉冉徂  
入都還復意踟躕  
君恩未許容閑住  
又逐東風到海隅

石柏山房詩存卷之四

石柏山房詩存卷之五

太湖趙文楷著

槎上存稿

奉 命冊封琉球國王留別都中諸友

滄溟東去是琉球飛楫來迎使者舟萬里鯨波勞遠夢五

回龍節下炎洲

本朝冊封中山至此五次

直教薄海霑 皇澤敢謂

乘風愜壯遊辨岳山頭迴首望

辨岳琉球山名

紫雲天半護

神

州

交到忘形信有緣可堪此夕悵離筵炎風朔雪懷人日玆

鳥蠻花異國天利涉儘堪援往事生還難必是何年

前使各有

險阻皆得無恙然踰年始返

從今獨醉中山酒一度相思一惘然

出都門重別諸同年

弱冠事遠遊恨未涉滄海每聞風濤聲此志竟何在仗節  
使東夷懷才愧庸猥壯遊雖可樂辱命得毋罪同人惜  
我去離筵感僚寀悲風西北來白日顏色改漠漠桑乾河  
日夜東溟滙欲去還踟躕征驂難久待珍重一尊酒相期  
在千載

珍禽集喬木所得惟良儔朝飛鳳皇池暮宿鵙鵲樓一鳥

忽飛去相顧嗚啾啾此去何時還不計春與秋以此慟中  
腸各各懷離憂我聞少海外乃復有九州借問此間人還  
在地中不並生天地間異域如同禍但使志不異皓首期  
同游去去勿復陳胡爲涕泗流

和李墨莊前輩良鄉韻

萬里自茲始此行殊未閑驚心惟素鬢送客有青山旅館

尋陳迹

正月入都  
曾宿此

新詩破醉顏年年潞河水清響到城灣

宿富莊驛風霾大作

春陰漠漠雨如麻三月寒城未見花苦霧不開山嶂黑大

風初起日車斜薄醪敵冷應無力短鬢霑塵似欲華却憶

故人山寺裏紙窗重閉細溫茶

謂潘  
築巖

至阜城大雪和王見大韻



霰雪乘風急平林極目遙懸冰鷗吻合濺玉馬蹄驕寒色  
籠青靄春陰罨碧霄野人泥沒脰相逐看襜輅

回首京華遠匆匆到阜城凍雲溪樹密殘雪戍樓明鼓角  
催征騎旌旗指去程抱關愧迎送生怕有侯嬴

平原縣

地入齊東界平原識舊名尊仙無曼倩遺廟有真卿暝色

歸鴉急春陰遠樹平行行看岱岳決眚眼猶明

顏魯公廟

漁陽鼙鼓震天鳴太息驅山草木兵中外祇知尊右相君  
王甯得識真卿山東諸將爭收復河北孤城共死生廟祀  
忠貞應不愧古原春盡暮雲平

宿園山

山勢當庭戶悠然遠客心  
古祠收晚翠細徑入春陰  
漠漠石泉月蕭蕭松樹林  
夜深殘夢醒清絕豁塵襟

### 望岱

雲開風日霽縱目入空冥  
石自飛來碧峯從太古青  
行行驚異態面面見真形  
已與山靈約籃輿莫更停

岳廟漢柏

時以阻雨  
不得登岱

我欲登泰山攀折秦時松山靈愁絕不我許下遣風雨百  
道來長空手持仙人九節杖悄然坐對青芙蓉傳聞岳廟  
中乃有漢朝柏冒雨試訪尋果然見奇特蛟龍盤拏勢崛  
強皮膚剝盡枝葉黑形容苦欲超尋常畢宏韋偃畫不得  
方廣數弓地六株如鐵立中有兩株相抱揖山妖木客來  
蟠蟄雷公下驅龍火焚至今尙有燒痕出摩挲此物三千

年坐閱人世如浮煙將無漢武爭得不死藥爲爾澆灌成  
神仙茂陵抔土須臾改荒草芊芊霜露灑可憐枉自求長  
生不如此栢今猶在我今浮楂海東北別君去兮長相憶  
天寒歲暮好歸來與爾扶桑一片石

廟有扶桑石在飛來  
柏下漢柏下無之

羊流店弔羊太傅

將軍緩帶輕裘日已信平吳自有期可惜封侯緣佐命由

來謀國在乘時三公折臂徂徠墓百代傷心峴首碑豈有  
酖人羊叔子生平陸抗是相知

過桃源贈同年曹梅溪

風雨淮南路春寒襲客衣故人多政績同志有光輝麥隴  
鳧初下桑陰雉不飛劇煩才易見莫歎賞音稀

共有高堂在憐君祿養榮

時梅溪迎  
母至署

白雲親舍遠滄海客

魂驚蜃氣樓臺出鯨波瘴癘迎別離應隔歲歧路若爲情

過淮安鐵冶亭師以督漕紀恩詩見示和韻二

首

飛輓從知任最艱丁男調發力云殫度支今見紓奇策轉  
運由來是要官 寵命獨專開府節風流還憶侍臣冠政  
成得似清淮水萬頃波瀾擇地寬

銜命馳驅赴海東  
又從鈴閣坐春風  
謝詩顏筆傳人徧  
岸草汀花涉趣同  
尊酒何緣傾北海  
瓣香吾願拜南豐  
雲箋一卷如冰雪  
日誦千回倚短蓬

露筋祠

環祠湖水浸明霞  
桂棟蘭旗噪暮鴉  
一徑白雲荒草合  
行人祇上玉鉤斜



過高郵州

我來不見秦淮海流水寒鴉繞郭門

用少游山抹微雲詞語

渺渺吟

魂成古昔萋萋芳草怨王孫江潮風落寒無影湖月煙高  
碧有痕惆悵一春花事盡高城燈火又黃昏

至杭州中丞阮芸臺前輩招游天竺諸勝以詩送

行和韻二首

重臣作鎮自風流藉甚聲名照十州節鉞撫綏秦郡縣韎

鞬趨走漢諸侯巖邊苔蘚留椽筆

飛來峯有中丞題名

海上鯨鯢怯

戰舟

時中丞奏請修理戰艦

繭紙飛紅多暇日玉堂還爲紀前游

原詩

及前在詞館事

渺渺滄溟萬古流手持龍節向炎洲求仙不詣蓬萊島屬

國空慚博望侯兩浙湖山容短屐一尊風雨在扁舟

時泛舟西

湖  
重來已是探梅候更到孤山續舊游

錢塘觀潮

黑雲漫漫天欲晡南風浙瀝吹菰蒲江頭雨點大如豆  
鷺鷥老鸛鳴相呼大船候潮如伏雛小船拍拍如飛鳧  
岸人譁言潮欲至天地改色川原殊蒼茫萬里但一氣  
中亘一綫相縈紆銀濤雪浪拍天立素車白馬驚奔驅  
雷公訇訇

鼓聲怒石岸駭落鞭羆羆陽侯驕舞奮絕力萬鈞一擲心  
膽麤倏然欲去不得住百怪曼衍千靈趨長鯨掉尾鼉不  
語奔走愧汗如追逋孤煙落日萬頃碧江海宛然雙玉壺  
來何勇迅去何順事殊興極長嗟吁平生麗景飽兩眼如  
此壯觀天下無適將入海間廣利紛紜作態胡爲乎吾聞  
司潮有專職云是當年種與胥亡吳霸越須臾事功罪俱

屬西家姝爾來事過數千載餘怒未泯猶睢盱越民芸芸  
亦何罪石塘頽蝕荒膏腴擇主而事古所策功成不退甯  
非愚可憐白首鴟夷子不及扁舟范大夫

過釣臺

寂寞嚴陵瀨高風百代名至今江水上永夜客星明山小  
簷牙出潮來石齒平官船聞伐鼓猶欲事宵征

宿漁梁

再入閩州境漁梁舊有名亂山爭雨勢孤石逼灘聲風景  
清如許年華去太輕擔簦前度客驛吏漫逢迎

乙卯曾游閩

聞鷓鴣

山排刀劍趨閩嶺水擁蛟龍下建溪已是行人行不得青  
山還遣鷓鴣啼

至福州荷蒙 恩命以西僧班禪所進右旋白螺

安奉舟中用資利涉祇領感 恩恭紀

八孔玲瓏脉右旋

螺身有八孔

靈淵胎孕是何年來充西旅神

僧篋曾護東征上將船

前福大將軍征台匪曾奉命安奉隨行

白玉一拳隨

絳節素蟾雙照破蒼煙

九重南顧真無已卻捧琅函淚

泫然

加封天后垂慈篤祐四字

命臣文楷

於福州致

祭禮成恭紀

水德尊元后神功徧大川

皇靈嘉惠若祀典協幽元有

宋開基日惟神降誕年普陀現前世

相傳天后是觀音化身

湄嶼應

高躔

湄洲嶼天后降生之地

照井神符出

少時照井有神人捧符出授之

持機父命

全

據機而瞑救父溺海

冲虛方厭世昇舉已飛仙四海仁慈布三朝



祭禱虔懷柔逢

聖帝崇奉配皇天

康熙二年加封天后之號

捍患燈

光現扶危雀羽翺波濤隨杖策風雨應筵筭

神前杯琰最驗

近有

鯨鯢在遙看島嶼連漂流殲賊窟安穩護兵船

官兵勦艇匪神助順

著

恭默思無斁

加封命已宣十行

丹篆下四字碧

瑤鐫節使恭銜

詔祠官肅布筵齊明奠牢醴跪拜盛班

聯

福建文武官俱陪祭

香霧雲旗下回飈翠蓋懸壽官停要眇歸馭

送連蜷姑米滄溟外

姑米琉球近島

扶桑曉日邊臣心竭忠信

帝念爲殷拳

冊禮應時舉封舟定早旋試瞻芝座上漠

漠起祥煙

和慶晴村將軍送行韻二首

鰲峯小別五經春

乙卯冬去閩今五載矣

鴻爪泥中迹又新三島波

溝憐遠使八閩節鉞屬親臣牙旗傳令軍先肅繭紙揮毫

句有神咫尺不教風雨隔鈴轅來往許頻頻

寓館與將軍署最近

越王城畔水天同螺女江頭盡日風此去好看櫻島碧

櫻島

琉球名山名竭來猶及荔支紅鮫人百道迎飛楫海國千靈懽壽

宮

時奉命諭祭天后并祭海神

已信布帆歸路穩波恬不擬問弓隆

甲子

神名弓隆呼之入水不溺

和汪稼門中丞韻

善俗由來藉大賢如公清德直無前筠簾晝靜垂銀蒜鈴  
閣春深長木蓮寬政不殊溟渤水新詩猶憶建安年如聞

聖主紆南顧褒璽時時到九仙

九仙閩省山名

卽看畫鷁催飛急深愧林鳥反哺慈

原詩言及萱堂

滄海經年勞

鶴脰青山一桁列蛾眉樓臺蜃氣朝成市風雨龍堂夜詠

詩此後迴腸定何處望仙閣上獨醒時

望仙閣在琉球崎山上

食荔支

南風五月荔子丹此物閩中推第一吳儂饒口今再嘗冰  
盤歷亂星毬出輕紅擘破淨如雪淺碧噉來甘似蜜祇覺  
腑臑生清涼飽食甯須愁內熱桄榔葉落雨注面葛衣披  
肩脚不襪手斟椒醕百九空那顧旁人笑饕餮驅車直走  
六千里黃塵漲天迎赤日扶桑南望何漫漫天與紅香慰

愁絕長安華筵重果實堆盤但覓梨與栗若教得此顏虬  
珠日費金錢那可說惜哉尤物生瘴鄉雪豔冰姿盡埋沒  
遂令市僧一錢看天公好乃太屑越從來佳人在空谷黃  
土離離塋香骨始知金屋與蒿萊驗以妍媸應未必爲君  
更作十日留願我健啖齒不血新詩爲繼玉局翁好與傾  
城更饒舌

坡詩風骨似  
是傾城姝

五月初七日開洋

旌旗鼓角動黃昏使者樓船出海門萬里有家迷遠夢一  
身如葉去中原雲來島嶼形疑似夜靜魚龍氣吐吞珍重  
此行勞 聖慮莫將奇險更輕論

舟出五虎門

漭蕩浮元氣微茫接太空天風吹浪碧海日射潮紅五石

疑蹲虎三山不度鴻  
余心隨掛席已逐百川東

過釣魚臺

大海蒼茫裏何人釣巨鼇  
老龍時臥守夜夜浪頭高

渡海放歌行

舟至大洋從人皆懼哇吐者相枕藉因登舟後  
將臺歌以作其氣



朝登南臺舟暮發五虎門長風獵獵西南來海天一氣羲  
娥昏手持龍節向東指一別中原今始矣借問何時却復  
還海水直下千萬里黑溝之洋不可以徑跨雷隱隱兮在  
下龍之來兮從如雲天吳海若爭紛紛雨翻盆而直注浪  
山立而撲人坎坎兮擊鼓捶大豕兮投肥斝兵戈林立礮  
車轟長鯨戢尾茹不吐忽雲霽而天開見姑米之一柱誰

言滄海深滄海終有底政如地中覆杯水不然安得有此  
山我行正在地中耳蓬萊瀛洲方丈山山山相間虛無間  
徐福一去不復還秦皇漢武何神仙人生不死亦何有不  
如生前開笑口一時憂懼徒勞心安問千秋萬歲壽東海  
有螺剖爲樽注以松醪容一斗回頭更語神仙叟醉中少  
異壺中否璫漿玉液吾何爲但願此海成春酒

十一日見姑米山

近中山矣

三日天風便遙看姑米山五峯排水面一綫出雲間遠目  
真空濶狂濤若等閒舟人齊舉首驚喜破愁顏

李墨莊舍人自閩撫署攜荔支二株渡海種於使

院

種向扶桑國來從牧荔園

牧荔園閩撫署貢荔支處

孤根託絕域宿土

憶中原海雨新枝溼閩煙舊幹存島夷應護惜毋用插籬  
藩

知公有遺愛卽此是甘棠涉海五千里傾城十八娘

聞中荔支

以十八娘  
爲佳種

宿緣真不偶異國亦何傷却羨重來者新紅任

飽嘗

使館樓中

海雲漠漠樹蒼蒼樓對平山一桁長霧隱簾前無鳥雀

山中

火鳥雀

潮來窗外有帆檣

牆外卽那霸港潮來時諸島貢舶皆至

鐘聲隔院丁

冬響

隔院卽下天后宮

花氣巡簷自在香高卧繩牀消永晝此身

忘却在殊方

遊臨海寺

在北苑臺上

海上何年寺峻嶒倚礮臺沙隄晨雨潤石壁午潮來設險

形無缺

砲臺兩岸夾聳港中皆鐵板沙中山險處也

憑高意轉哀可憐豐見壘

狼藉長莓苔

豐見城係山南王故都

長沙僧寄塵以詩投贈和韻四首

自笑非才奉簡書玉京科第愧盧儲空門有約抽簪後海國今來拂榻初蓮社幸偕同志侶鶴巢應共半年居乞公緣覺公無惜不說牟車說鹿車

妙畫通靈溢顧厨新詩戛戛探驪珠

寄塵善畫能詩

煙雲胸已忘

湘曲金石聲猶徹海隅太白舊傳開士句杜陵原是贊公

徒

寄塵爲墨莊同行者

從今領取滄溟濶不數君山萬頃湖

世界恒河不盡沙談空枉自任毘耶手持香積如來鉢身  
上銀河博望槎酒肉豈能妨佛法海天隨處是吾家閑雲  
野鶴無心久肯歎汪洋未有涯

天風安穩趁溟鵬何異凌虛八駿乘破浪已堪酬壯志  
龍瑞合仗高僧中山酒熟休停盞半夜詩成急剪燈爲語  
妙音須愛惜莫教容易聽迦陵

隨封游擊將軍陳瑞芳卒於琉球以詩輓之

頓失同舟侶偏憐上將才旌旄三島遠涕淚一軍哀  
迷歸路悲風撼夜臺故鄉千萬里猶自望君回



二豎成夷鬼

陳歿前二日二鬼守牀前狀如琉球紅帽官兵役皆見之

孤魂泣海天島

桅充馬草

球無杉木又不善製棺尋以太平島船桅命隨行匠人爲之

蠻槥冥蛟誕生

死誠如寄功名已足傳縱令終牖下徒得婦人憐

過那霸人家

編蒲席地竹簾櫳六扇屏開面面風一種清香消不得佛  
桑圍在蠣牆中

奧山龍渡寺

寺旁昔有大蛇蟠窟中異僧咒之遂渡海去故名

言尋龍渡寺來上奧山巔苔色緣厓古松陰偃蓋圓鶴頭

盤遠勢

山有峯名鶴頭

蛇窟閉經年咒鉢僧何往無人解悟禪

波上寺觀海用前使周海山先生韻

波上寺在吐山西北一名

箕厓

雲容天色黯如秋渺渺波濤去不留萬里中原隨浩蕩千

年元氣共沉浮誰云問渡尋河鼓我已忘機狎海鷗好語  
山僧勤掃榻重來擬作醉鄉遊

放舟輿山

中山有小舟其制剗獨木大者如野航長短丈不足四面  
去欄楯亭亭有板屋風雨不打頭雲山欣寓目我游愛此  
坐轉棹青溪曲潮掀浪勢高風轉波紋颭鷺鷥起我前兩

兩去相逐小魚白如銀翻飛落霜鏃

水中有魚能飛

蠻榼餘福酒

中山紅酒名福酒出麻姑山

夷官饋山藪醉後新月高  
清光銜嶺谷照

此碧波心頻頻以手掬雲來  
山骨青煙淨松陰綠舉手謝  
同游吾欲從茲宿

### 諭祭中山先王廟

松岡鬱鬱水浹浹廟在真和安里村

首里西

紫帽車前趨相

國素衣道左拜王孫

中山王因未受封尚稱世孫

千年帶礪雄鯨海百

道香煙繞螭門敬舉一杯酬世德須令存歿識

君恩

游龍洞

在龍渡寺旁龍洞松濤爲中山八景之一

奧山有龍洞龍去不知年惟有千松樹濤聲驚夜眠佛奇

常閉閣

佛像多怪皆閉閣中

僧老自安禪釣得神龍子歸途雨滿天

時於潭中得二鯉魚以歸

游東禪寺

在久米府南

蕉衫蒲箠晚風涼  
偶爲尋幽到上方  
禪榻不收松子落  
佛燈初上篆煙香  
閣前海氣留殘雨  
花外鐘聲散夕陽  
懶向夷僧頻問訊  
無言對我澹相忘

中山七夕

此夕復何夕  
佳期成古今  
女牛光皎皎  
風露夜沈沈  
爲問

銀河水何如滄海深閨中有少婦相望淚沾巾

夜起

寒藤古木作秋聲坐擁孤衾正二更  
大海波濤鄉夢斷殊方氣候客心驚  
樓頭月落鵂鶖語簷角風多蛤蚧鳴  
自起推窗望牛女濃雲薄霧不分明

壁間蛤蚧終夜不住作聲

七月十五日

海外中元夜人家戶不扃招魂旛是紙

是日以紙剪旛樹庭中迎祖

炬如星

門皆列火炬

鬼颺雲陰黑

中元必有大風名鬼颺

龍濤雨氣腥殊

方欣見異且莫歎飄零

七月廿四日行 冊封禮口號

瞳眈曉日館門開謁者傳呼絲仗來一道祥光東去疾天

書已過望仙臺



海東十丈紅雲起，照見波濤萬頃丹。  
行到七星山頂上，萬人回首一時看。

守禮坊前歡會門，拜迎猶自號王孫。  
山龍賜服君恩重，始信藩王氣象尊。

羽士謹呼擁節旄，歸途落日下平皋。  
王人序在諸侯上，梯述甯辭拜送勞。

球語主人  
曰梯述

冊封禮成紀事示中山王

積水東溟濶朝天北極高由來通島嶼終不隔波濤番舶

時通鷁夷官久貢葵如聞封冊請常有制書褒勅

使三天下章身一品叨

恩賜使臣正一品麟蟒服

鸞旂朱罕直龍節

繡衣韜五日經滄海雙舟入近濠川原誇衍沃將卒戒驚

騷諭祭光楹桷榮施奠醴醪

先擇日行諭祭禮

續戎光偉烈貽

厥及英髦

今國王乃以孫繼祖者

筮日宣

綸綍開門伐鼓磬一軍

披組練夾道肅弓刀松嶺三竿日泉崎五丈旄瑞泉坊突

兀刻漏徑周遭

瑞泉刻漏皆王宮門名

拜跪開

丹誥傳呼賜錦袍

贊襄惟一相趨走是三曹

相國下三法司官最貴

賚及璫琚妃歡

騰髻首豪

是日外島酋豪門外列觀

迴翔銜

詔鳳抃舞戴山鼇

寶

翰觀瞻徧

行禮後王引使者於正殿三層樓上瞻仰

御書

層樓結構牢綴聯星

斗燦呵護鬼神勞中殿儀皆備南宮靜不囂

王肅客  
肅賓

供粉餌宴客却檀槽

此次以國諱傳免筵宴作樂

落日飛鳥影秋風拂

雁毛片帆看欲掛歸路詠將翺

此後惟候風信回朝矣

帝德頻沾

旣王心不怠敖相思若潮水終古去滔滔

### 波上望中山形勢

三山橫踞水東流

前中山山南山北國分爲三所謂三山也今混一已三百餘年矣

地比

不木上房言子  
卷五  
三  
真丹一小州天外丸泥增薺芥水中菰葉共沈浮向來戰  
鬥爭蝸國盡日煙雲護蜃樓誰信吾生太奇絕此間還作  
半年留

約李墨莊游奧山

夜來風雨過天氣近新秋沙路淨如拭山光翠欲流鶴頭  
環紫翠龍洞闕清幽爲問青蓮客猶能乘興不

再游奧山

我愛中山游就中奧山好兀突壓滄溟天風吹浩浩東臨  
勢壯濶西眺境幽宵其中若坳堂一徑出雲表松老森龍  
鱗石奇蹲虎爪脩岩通曲港潮汐爭縈抱蒼茫碧無垠飛  
來雙白鳥蝴蝶野花間驚人去嫋嫋物情各有適生意不  
潦草興愜已重來情深恣幽討白日忽西傾薄霧生林杪

歸舟雨冥冥一棹煙波渺

紫金大夫鄭國樞和余波上寺詩以此贈之

誰令空谷詠生芻白首風流鄭大夫解語何曾謫鼠璞論  
文信已得驪珠老餘壯志爭騏驎新有詩名屬鷓鴣須信  
相逢緣不偶履聲來往莫踟躕

游重島蕉園

八景之一在泉崎  
南昔多芭蕉今廢

舊跡蕉園在芭蕉等劫灰已無甘露採

蕉結實名甘露

惟有栗蘭

開海日飛殘雨溪煙漾碧苔石梁騎馬去吾意更遲徊

### 游壺家山

卽城岳在真和志古波藏村

石磴盤青松白日氣蕭爽天風何冥冥吹此驚濤響松間  
有靜地草細平如掌拂榻坐其間瞻矚神獨往夷官向我  
言前年感游賞亭荒結構存春至莓苔上曲穴走清泉平



田多白壤先王有尚豐神智邁前往一變杯飲風師心事

陶旄

球前無磁器王尚豐始以意爲之此地其陶廠也

猗嗟國有人不愧蠻夷長

巖壑異陰晴莎徑披荻蔣會待秋風生重來挾藤杖

### 秋色

秋色來滄海蕭蕭一夜風寺鐘燈影外客夢雨聲中髮不

經霜白顏應借酒紅席帆已收拾歸路道山東

道山亭在福州烏石

上山

游辨嶽

在崎山西南

平生恨不陟崑崙豈料扶桑看曉暎山鬼一祠秋祭祀海

天五阜漢屏藩

此山及八頭嶽佳楚嶽名護嶽恩納嶽爲中山五嶽

蓬瀛樓閣言皆

幻泰華兒孫勢亦尊三百年來餘戰壘鼎分遺跡竟何存

山下有舊

時戰壘

球輶

細竹編成以木橫貫於頂上而昇之

細竹編輕籠肩承若等閒坐應容宕漾行不礙孱顏疏箔  
宜攤卷微風好看山時逢溪上雨歇在野花間

中山王贈刀

刀購自日本球人諱言與倭通則日出寶島其  
實寶島惡石島土噶刺皆倭屬也

寶島刀長四尺強誰與贈者中山王奚官當筵拔出囊皎  
皎白日寒無光青天無雲赤蛇下山精水怪爭潛藏從人  
驚顧毛髮立長風萬里來虛堂我行拜受納入室素壁高  
懸氣蕭瑟橫施雙鼻制作奇裹以鮫皮緣以漆君不見歐  
陽公賦日本刀矜誇異域來何遙此刀本出土噶刺夷人  
諱倭不肯說惡石之島出精鐵中有清泉流出穴碧瞳蠻

奴投之困深藏那復計歲月七月七日鼓鑄成釁以千年  
老蛟血生不願提刀取封侯不用三刀夢益州刀來刀來  
與爾一杯酒一生伴我長遨遊歸舟渺渺秋濤碧手把鋸  
鋒時一拍雷聲隆隆電驚飛海若天吳都辟易長鯨百丈  
爾何爲看取漫漫海流赤

中秋長風閣作

正使所居之樓日長風閣

長風閣外海連天  
天上嬋娟月正圓  
波浪聲從簷際落  
山河影向鏡中懸  
秋來鴻雁無傳信  
夜靜魚龍未穩眠  
莫望中原歎離別  
幾人生到海東偏

球女

異俗一何怪  
南姑頂竹籃

球言女曰南姑以竹籃盛物頂於首無論輕重總不以手執也

交通惟亥市

如中國之趁墟皆女無男

負戴少丁男  
赤脚拖三板

球履名三

板青絲倒一簪

簪末向前

侏儻衣紅絹倚市更無慙

坡皆衣紅以自別土

名侏儻猶

言傾城也

首里秀才向世德等晉謁館中分韻賦詩題其後

向生等皆王親族貴公子

繭紙分題擊鉢催揮毫詩就亦奇才從今不數韓陵石網  
得珊瑚海上來

中山王招游東苑值雨晚歸

苑在崎山上

海水空濛裏斯園足靜觀石樓環晚翠松蓋倚秋寒椽桷

淳風在

亭臺皆堅樸

尊彝禮數寬亭東纔咫尺未上舞雩壇

亭東

土阜一邱形如覆孟是其國雩壇因雨未能上

海雨蕭然至濃陰晚不開簷牙懸碧溜屐齒涓蒼苔靜室  
雲煙入歸途燈火催主人殊好客攜手約重來



中山王送菊却憶去年假歸友人送菊值病不能  
飲今又一年矣

隔歲東籬菊相看正病中身來滄海外花與故園同島石  
參差倚溪煙淺澹籠殷勤主人意莫放酒尊空

雨游砂岳

在小祿大嶺村海中一里許有  
巨石楞然如屋可容百餘人

黑雲如席雨霏微渺渺西風吹客衣醉向砂川

在山下尋石

室馬蹏濺起浪花飛

馬行海中水深及腹而穩如舟

石洞天開一奧區朝趨海若暮天吳此間容我垂綸坐萬里烟波一釣徒

垣花村

在儀間山下多米廩

策馬儀間去微風曉日初孤村流水入一徑野花疎米廩無防柵

地少盜賊米廩皆在野無防守者

秧田任隔渠重陽看欲近東作

已菑畬

中山九月耕  
田十月布秧

野鷹來

鷹以九月東北風自  
外島飄來不久卽去

野鷹來風蕭騷海天漠漠秋雲高盤空欲下復不下禽獸

走匿亡其曹扶桑九月天猶熱十五五爭先發翩然一

擊覺身輕萬里平蕪灑毛血野鷹來來何處云是伊平與

由呂

琉璃  
屬島

此外之水乃弱水古來無人至其所其中云有

三神山樓臺瑀樹虛無間鳳皇鸞鶴好儔侶何爲舍此來

人寰肅肅復肅肅飛來上我屋似曾識我中原人獨立愁

胡側兩目此鷹亦非鷹此是當時海東青

金元間市海東青於海上當

時興平爲爾建大屋金鞵玉條披彩翎琵琶彈出新翻曲

曲名有天

天山圍坐千人聽方今

聖人戒游豫高拱深

鷺避海青

宮奏韶濩太阿一拭封狼摧那顧草間狐與兔買鷹懷鵠

非其時爾縱奇姿終不遇野鷹來無久住雲飛海擊入空  
冥慎勿飛入中原去

龍潭

在王城瑞泉下流漚處水甚清游魚可數

一泓澄澈映冰壺深處魚龍乍有無欲探驪珠向潭底眼  
前恨少水精奴

游中山王新闢南園

在宮南近村

南園臺館鬱嵯峨千騎游行載酒過海上煙霞丹嶂遠山  
中草木白雲多蛟宮夜靜驚燈火錦石秋深媚綺羅欲向  
洞元探玉訣未知蓬島近如何

國相尙周園

辨岳歸來晚名園駐馬蹏苔痕隨石濶山影入簷低尊酒  
衣香入帷燈夜色迷倚欄無限意珍重壁間題

王叔尙容園小飲

膽甌新插菊花枝  
共向花前醉一卮  
歸去馬蹏沙路穩  
西風吹我帽簷欹

法司向天迪園

爲有尋山約  
言過鄭李莊  
雲陰迷鶴徑  
海雨潤漁梁  
靜几時攤卷  
高懷一舉觴  
菊花開太晚  
明日是重陽

龍鰕

館人供饋苦好異就中有鰕形最奇怪哉生平目未睹貝  
錦映日光陸離八足盤珊兩目出森森介冑張之而人言  
此物是龍種胡爲入饌充朶頤東海漁人潮下上釣取巨  
魚二十丈中流有柱插天長漁人識是鰕鬚張移舟緩避  
不畏懼眼看奇物如尋常海雲漠漠雷且雨恐有蛟螭來



攫取老饕悉取付庖厨快刀細研如飛縷對酒當筵欣果  
腹何如桂臺老蛟肉

寄生螺

天地本蘧廬乃爲衆生竊百年亦寄耳過眼電光瞥海螺  
有遺蛻潮汐盪逾潔有蟲入其中偶爾相聯綴日久形亦  
化契合猶居楔六足藏盤磴一螯當戶闌緣壁如懸珠爬

沙類跛鼈有時復驚人退縮影倏滅偉哉造化功生理亦  
何別鳩旣奪鵲巢蟹亦居蛇穴入室任他人千古同一轍  
太息謂微蟲保身要明哲

石松

生馬齒山下海中漁人泗水  
得之石質赤色亦頗似柏

君不見馬齒山下海千尺海水中有古松柏森然非柏亦  
非松何人鏤刻琅玕石葉纖纖兮枝玲瓏血色萬古洪濤

中巧匠咋舌噤無語信是天巧非人工馮夷之宮夜開晏  
火樹千枝萬枝見朱鳳當筵怒尾張赤龍繞座文鱗禱挹  
婁赤玉難爲色石家珊瑚何足羨漁人偷折一枝來河伯  
驚呼走雷電君不見滄海桑田一劫灰今朝波浪昔蒿萊  
摩挲此石亦非石恐是麻姑親手栽

海鰻

東海有蛇人不識身如朽索色如墨瘁瘁可畏勢絕倫對  
此生憎况復食青絲纏縛翠筐陳夷人以之羞嘉賓自言  
致此亦不易買得一兩朱提銀問之何爲爾其味甘且旨  
可以已大風可以固牙齒螂蛆甘帶鴟嗜鼠啗象咀蛇何  
處所吾甯異味失當前性所不能難強茹老齒未病身無  
風安用毒物來相攻

使館卽事適首里毛生長芳等投詩書此答之

天風東引碧牙幢爲策名王入海邦雨露從知原不二姓

名休說是無雙樓頭獨醉銀瓶酒耳畔何來鐵鑊腔

時隣舍有

聲遂多謝諸生勤贈答啞鐘難得應筵撞

### 中山馬

我聞青海之駒高八尺龍種不許尋常識豈知海外扶桑

東歛見當年好頭赤館門晨開森畫戟黃帽奚官平屋幘

青髮剪出三花高

球馬皆剪髮

當階牽來氣無敵雙瞳回顧凡

馬驚四蹏矗立如鐵色偶然振鬣一長鳴秋天無雲日色

白錦韉絲轡金絡頭我時騎向南山游直渡淺海如舟浮

惟聞兩耳風颼颼我行萬里半天下恨不千金買駿馬憐

才辜負九方歎空見駑駘徧原野豈如此馬好骨相路隔

滄溟空悵望若教飛取入中原百戰功成圖閣上中山地  
險無甲兵昔日三分今蕩平可憐好馬千萬匹脫銜負輓  
營春畊中山牛少畊田俱用馬十月秧田青瑟瑟芳草無邊半斜日  
時平皂櫪老驂騮努力畊田未爲失

秋已盡矣溽暑猶如盛夏晡時雨過涼生喜而有

作

雷聲隱隱復隆隆樹杪微微少女風  
山雨忽來收返照海雲初起落長虹  
無情滌暑經秋後未老衰顏滿鏡中  
遙想長安詞賦客薄寒終日對簾櫳

中山王贈東洋紙

春蚓秋蛇苦屈盤雲箋惠我勝流紈  
興來自作襄陽體染得煙雲在筆端



又贈團扇

取次多情拜惠風  
團團統扇製成工  
從今一事誇人說  
明月攜來大海東

球俗

國儉無加賦  
民醇不拾遺  
入門皆跣足  
舉案定齊眉  
關鍵成虛器  
兵戈祇飾儀

國無盜賊  
戈戟以木  
爲之備儀  
制而已

官閒無一事  
支

枕更圍棋

終朝惟蘋飯

仕宦家食米餘皆飯薯蘋

十月尙蕉衣

民冬夏皆蕉布爲衣

魚蟹形

模異蚊蚋旦暮飛

蚊甚多惟己午二時不出

怪雲知蜃出驟雨識龍歸

始信滄溟濶還家夢亦稀

東禪寺見王夢樓前輩壁間題句有懷其人

丙子冊封

正使全穆齋前輩請先生爲從客

東禪寺裏聞鐘處

詩有來聽東禪寺裏鐘之句

壁上留題四十年蓮幕

偶隨滄海使槐廳原是玉堂仙文名自昔雞林重詩板於

今麝橙懸

球人刻公詩於板並佛像懸之表異錄麝橙謂繡佛也

惆悵當時裊袂客

相逢話舊各華顛

當時貴戚子弟歌舞奉客如翁毛各公子皆曾侍先生酒筵今皆官於王朝黃

冠白首爲言舊

事聞之悵然

留別中山王

九月濤聲捲暮煙秋風秋雨悵離筵東來滄海疑天末西  
去長安近日邊鴻跡偶留成勝概蜃樓親見是前緣聖  
朝中外無遐邇珍重他年令德傳

中山王至館送行手奉金扇爲別書此報謝

海上暮雲合歸潮一夜生青山離夢在落日故園明拜賜  
誠無已藏珍未敢輕由來溟渤水不及主人情

留別中山士大夫

東風昨夜蕭然旅客之魂秋雨連朝淒絕離人  
之緒僕乘楂東至持節西歸掛海上之孤帆望  
刀頭之明月然而浮屠桑下欲別殊難那霸江  
邊重來未必諸大夫惠而好我舉國人皆不棄  
予荷長亭折柳之情值大海迴瀾之候經年爲

客慨援筆以增愁  
七子從君請賦詩  
以見志  
倘能報玖定擬藏珠

七星山上望中原  
瘴雨蠻煙氣吐吞  
甲帳未應留夢住  
弓衣見說有詩存  
路經馬齒看山色  
天入龍沙落漲痕  
十丈蒲帆風力健  
去來安穩載君恩

相逢傾蓋忍言歸  
後會重期是也非  
雪渚鴻泥遲我跡  
海

天龍雨溼人衣一尊酒盡寒潮急九月霜清木葉飛珍重  
漫湖隄下水垂楊垂柳最依依

登舟後國王以生世子告漫成四絕賀之

一朶紅雲匝地開歡聲環島響如雷翻思昨夜西風緊知  
是瑤池送得來

浴出蘭湯繡襖新恰逢 天上降恩綸明年 鳳詔銜來

處彩幄從添後拜人

回朝使節拜 臨軒定有 周咨許盡言一事博來 當

寧喜海東新得小屏藩

三日扁舟滯海濱去來遲速定前因歸途贏得逢人說親  
見炎洲產鳳麟

吾師 介山先生稟剛直之性負開達之材少習幕



務請練政事

今上御極之元年以第一人及第中外以名臣期之歲庚申詔舉可冊封琉球者僉以先生對遂與李公墨莊偕行約束嚴明舉動得體成禮而復

天子嘉之將大用焉試以吏事出爲山西雁平道任事四年遽卒於官先生氣體素壯自海外歸心往往而悸

言笑異於他日蓋風波危險奪人神髓調養猝難平  
復也公子孟然過蘇出槎上存稿一冊見示金釗受  
而讀之清雄曠邁力摹大家一種俊偉伉爽之概恍  
然侍几席而聽言譚也先生以大有爲之才遭際  
聖明未竟其用區區以吟詠傳於後良可慨已一鱗  
一爪又忍聽其散佚乎爰亟付之梓而志其梗概於

此嘉慶二十四年歲在己卯秋九月旣望受業湯金  
釗拜手謹識於江蘇學使署之崇素堂

石柏山房詩存卷之五